

## Kapítulo 13

# DOKTRINA DI IGLESIA, ORDENANSANAN I TEMPEL

Kiko mormonnan ta siña tokante nan iglesia, nan tèmpel i nan diferente ritonan i seremonianan?

### I. DOKTRINA DI IGLESIA

Segun *Doktrina i Aliansanan* 1:30, e Iglesia di Hesukristo di e Santunan di e Deláster Dianan ta "e úniko iglesia bèrdadero i bibu na mundu." Mormonnan ta kere ku e iglesia ku Hesus a funda a desviá for di e siñansa bèrdadero di Skritura, i ku Hosé Smith a restorá e iglesia bèrdadero na mundu.

Segun tèstimonio di Hosé Smith den e buki *Pèrla di Gran Preis*, mormonismo ta resultado di su búskeda pa e iglesia korekto.

"...mi a puntra e pèsonahenan ku tabata para riba mi den lus, kua di e religionnan tabata korekto—i kua mi mester uni mi mes ku ne. Nan a kontestá mi ku mi no mester uni mi mes ku ningun di nan, pasobra nan tur ta kiboká; i e pèsonahe ku tabata papia ku mi a bisa ku tur kredu ta un abominashon den su bista; ku tur e konfesornan ei ta korumpí; ku 'nan ta hala serka mi ku nan lepnan, pero nan kurason ta leu di mi, nan ta siña doktrinanan i mandamentunan di hende, teniendo un forma di santidat, ma nengando e poder di esei.' Atrobe el a prohibí mi di uni mi mes ku kualke di nan..." (Hosé Smith 2:18-20).

E tèstimonio aki ta demonstrá dikon mormonnan ta rechasá kristianismo i tur otro iglesia. Brigham Young a bisa ku tur kristian ta "zeilu den skuridat"<sup>1</sup> i ku e Dios kristian ta "e diabel mormon."<sup>2</sup> Di tres presidente di iglesia mormon, John Taylor, a haña ku kristianismo a "brui na fièrnu"<sup>3</sup> i ta "un bulto perfekto di lokura...diabel no por a inventá un mihó hèrmènt pa su obra por bai dilanti..."<sup>4</sup>

Mormonnan ta konvensé di e superioridat di nan iglesia. John Taylor, a sigui broma: "...nos ta e úniko pueblo ku sa kon pa salba nos antepasadonan, kon pa salba nos mes, i kon pa salba nos yunan den e reino selestial di Dios;...di bèrdat nos ta e salbadornan di mundu..."<sup>5</sup>

Ma den último añanan, e Santunan, kambiando nan táktika, a lansa un kampaña formal pa ser aseptá komo un religion kristian...loke nan antes a konsiderá un "abominashon." Awor nan ta deklará ku nan ta adorá e mésun Dios...e Dios ku nan a yama "e diabel mormon." Ta interesante ku e lèternan di "Jesucristo" ta skirbí muchu mas grandi riba e bòrchi dilanti iglesia mormon na Boneiru. Trágikamente, nan trasteria i kampaña engañoso ta un éksito, i hopi hende awendia ta konsiderá mormonismo un religion kristian, na lugá di loke e ta di bèrdat—paganismo.

## A. Denominashonnan Mormon

E Iglesia di Hesukristo di e Santunan di e Deláster Dianan ta bisa ku e echu ku tin tantu denominashon kristian ta proba ku e iglesianan aki no por ta e iglesia bèrdadero. En kontraste nan ta mustra riba nan iglesia komo esun bèrdadero i ta pretendé ku nan ta kompletamente uní. Ma esei no ta bèrdat. Tin diferente denominashon mormon tambe. Fuera di esun ku nos ta studia, e dos mas grandi i mihó konosí ta:

1. E Iglesia Reorganisá di Hesukristo di e Santunan di e Deláster Dianan (Reorganized Church of Jesus Christ of Latter Day Saints)

Esaki ta e grupo mas grandi ku a kibra ku e Iglesia di Hesukristo di e Santunan di e Deláster Dianan na aña 1844 i a organisá un denominashon independiente na 1853. Nan ta kere ku Hosé Smith a pasa su outoridat pa su yu Hosé Smith III i no pa Brigham Young i su susesornan.

2. E Iglesia di Kristo—Teren di Tèmpel (Church of Christ—Temple Lot)

E denominashon aki ta doño di e tereno unda, segun Hosé Smith a profetisá, lo mester konstruí e tèmpel. Nan ta bringa tur esfuerso di e Iglesia di Hesukristo di e Santunan di e Deláster Dianan di Salt Lake City pa haña e tereno.

Tin vários otro grupo ku a kibra ku e iglesia mormon prinsipal. No tin unidat entre e denominashonnan mormon manera nan ta pretendé. Di bèrdat por bisa ku e denominashonnan mormon ta uní riba tres punto so.

- Kada denominashon mormon ta kere ku Hosé Smith tabata un profeta ku a "restorá" kristianismo bèrdadero.
- Kada denominashon mormon ta kere i aseptá e skirbimentu di Hosé Smith komo skritura.
- Kada denominashon mormon ta bisa ku nan ta e "úniko iglesia bèrdadero" i ta akusá e otro denominashonnan mormon di a kai for di e fe.

## B. Saserdosia

Mormonnan tin dos saserdosia: e saserdosia di Aaron i esun di Mèlkisedèk. Beibel ta papia hopi tokante e saserdosia aaróniko di e tribu di Leví; esei ta bon konosí. Pero Mèlkisedèk ta ménos konosí debí ku e ta aparesé un biaha so den Beibel, Génesis 14:18-24 (su nòmber tambe ta bin dilanti den Salmo 110 i Hebreonan 5-7). Mormonismo ta siña ku e saserdosia di Aaron tin ménos balor ku e saserdosia di Mèlkisedèk.

Kada hòMBER mormon por pertenesé na un di e dos saserdosia, basta ku su bida i kreensianan ta kuadra ku e rekisitonan di e Santunan di e Deláster Dianan. Un mucha hòMBER di diesdos aña por bira un saserdote segun òrdu di Aaron, i ku 20 aña e por haña e saserdosia di Mèlkisedèk.

Segun mormonnan, nan a restorá e saserdosia di Mèlkisedèk. Ma ta dudoso ku nan a deskubrí e saserdosia aki den Beibel. Ta mas probabel ku nan a fia esaki for di e masonnan. No ta pa kasualidat ku tantu masonnan komo mormonnan tin e mésun dos saserdosia. E evidensia ta indiká ku Hosé Smith no a inkorporá e saserdosia di Mèlkisedèk te despues ku e mes a bira un mason. Un seri di ocho artíkulo di Oliver Cowdery a sali den e publikashon ofisial di mormonismo, *Messenger and Advocate*, kuminsando òktober 1834, entitulá "Esenanan i Eventonan Tempran di e Iglesia (mormon)." Niun artíkulo ni a mensioná e risibimentu di e saserdosia di Mèlkisedèk. Oliver a konta ku un angel (su nòmber no tabata duná) a aparesé n'é i Hosé Smith un biaha so, i a hasi nan saserdotenan (kua saserdosia no ta mensioná). Ocho aña despues, *Times and Seasons* a publiká artíkulonnan entitulá "Historia di Hosé Smith," i e relato di 1834 tabata kambiá drástikamente. Awor tabatin *dos* bishita, *dos* saserdosia, i *kuater* mensahero selestial. E angel sin nòmber (ku a duna Hosé i Oliver e saserdosia aaróniko) a haña

nòmber den di dos relato: Juan Boutista. Algun luna despues Pedro, Santiago i Juan a duna nan e saserdosia di Mèlkisedèk).

David Whittmer, un testigu di e *Buki di Mormon*, tambe a akusá mormonnan di inventá e saserdosia di Mèlkisedèk:

"Boso a kambia e revelashonnan for di e manera nan tabata duná promé...pa sostené e eror di Ruman Hosé ku tabata tuma pa su mes e puesto di Profeta di Iglesia. Boso a kambia e revelashonnan pa sostené e eror di sumosaserdotenan. Boso a kambia e revelashon pa sostené e eror di un Presidente, di e sumosaserdosia, konsehadónan grandi, èts. Boso a kambia e revelashonnan pa sostené boso pa bai mas leu ku e siñansa kla di Kristo den e parti di e aliansa nobo den e Buki di Mormon."<sup>6</sup>

"Nunka tabatin papiamentu tokante un puesto di sumosaserdote ni pensamentu di establese esaki den Iglesia te Rigdon a dreña. Kòrda loke nos tabata prediká desde ougùstùs 1829 te yùni 1831—kasi dos aña—i a batisá mas òf ménos 2.000 miembro den Iglesia di Kristo, sin tin un sumosaserdote. Diferente biaha na 1829 Ruman Hosé a bisa ku un ansiano ta e puesto mas haltu den Iglesia..."<sup>7</sup>

Kon ku bo bir'é, e saserdosia di Mèlkisedèk ta problemátiko. Mormonismo ta insistí ku solamente un pèrsona ku tin e saserdosia por trasladá esaki na un otro pèrsona. Si Juan Boutista òf Pedro, Santiago i Juan a duna e saserdosia di Mèlkisedèk na Hosé i Oliver, tin un problema serio, pasobra ningun di nan tabata saserdote desendiente di Mèlkisedèk. Kon nan por trasladá e saserdosia ku nan mes no tin? I kon Hosé i Oliver por pasa un saserdosia pa un otro líder mormon si ni Juan Boutista ni e tres apòstelnan por a traslad'é originalmente? I kon mormonnan por trasladá un saserdosia inválido awendia? Kon ku bo bir'é, e ta keda mésun inválido.

Ma na lugá di atmití ku e storia di e saserdosia di Melkisedèk ta un storia inventá, lídernan di e Santunan di e Deláster Dianan ta pretendé di no sa bou ki sirkunstansia e saserdosia di Mèlkisedèk a bin na vigor. E apòstel mormon LeGrand Richards den un karta sikiera a atmití:

"Maske nos ta hende ku ta tene nótulo, manera Señor a manda nos pa hasi, sinembargu nos nótulonon no ta kompleto...nos no tin e fecha ku Pedro, Santiago i Juan a duna e Saserdosia di Mèlkisedèk na nan."<sup>8</sup>

### C. Puestonan den Mormonismo

LeGrand Richards a lista e diferente puestonan den e Iglesia di Hesukristo di e Santunan di e Deláster Dianan:

"Den e saserdosia aaróniko tin e siguiente divishonnan: diákononan, siñadónan, i saserdotenan. Tin obisponan ora...nan ta skohé for di e sumosaserdotenan di e saserdosia di Mèlkisedèk.

Den e saserdosia di Mèlkisedèk tin e siguiente divishon i puesto: ansianonan, setentanan, sumosaserdotenan, evangelistanan òf patriarkanan, apòstelnan i profetanan."<sup>9</sup>

E lista aki ta kuminsá ku e puesto mas abou, i ta kaba ku e puesto di mas haltu fuera di e Promé Presidencia.

E puestonan aki ta optenibel solamente pa e kabayeronan; damanan ta eksluí por completo. Kada hóben di 12 aña ku ta digno por bira un diákono i haña e saserdosia aaróniko. Ku 14 aña e por ta ordená komo un siñadó, i ku 20 aña e por haña e saserdosia di Mèlkisedèk. E puestonan di mas haltu den iglesia mormon ta reservá pa esnan ku tin e saserdosia di Mèlkisedèk. E saserdote segun e òrdu di Mèlkisedèk ta kuminsá ku e puesto mas abou, esta e puesto di ansiano. Ku tempu e por bira un obispu òf asta forma parti di "e setentanan." Evangelista òf patriarka ta e siguiente rango ku e por alkansá, siguiú pa apòstel i profeta.

Riba e nivel internashonal, e Konsilio di Diesdos Apòstel ta esnan ku ta dirigí e asuntonan di henter e religion mormon bou di guiansa di e Promé Presidensía.

"Nan [e Konsilio di Diesdos] ta forma un konsilio ken su desishonnan unánime tin igual poder i outoridat ku esnan di e Promé Presidencia di e Iglesia. Ora e Promé Presidencia ta desorganisá pa motibu di morto òf desabilitat di e Presidente, e outoridat pa dirigí i goberná ta kai riba e Konsilio di e Diesdos Apòstel dor di ken e nominashon di e Presidencia ta sosodé."<sup>10</sup>

E presidente huntu ku su dos conseheronan tin e puesto di mas haltu den e Iglesia di Hesukristo di e Santunan di e Deláster Dianan. E tres pèrsona aki ta forma loke ta konosí komo e Promé Presidencia, i nan tin hopi outoridat.

#### **D. Organisashon den Mormonismo**

E iglesia mas chikitu di e Santunan di e Deláster Dianan ta konosí komo un filial ("branch" na ingles). Ora e ta krese pa (500 te 1000 miembro) i ta organisá ofisialmente, ta yam'é un divishon ("ward" na ingles). E iglesianan lokalísá den e mésun distrikto, huntu ta forma un "stake" (ingles) i nòrmalmente ta konsistí di mas òf ménos 4.000 miembro, pues un asociashon di iglesianan. E regionnan ta presidí pa e Promé Presidencia na Salt Lake City, Utah, esta e Presidente di iglesia mormon huntu ku su dos conseheronan.

E iglesianan mormon tantu lokal komo di distrikto sa vota. Ma en realidat ta e kabesantenan di e Iglesia di Hesukristo di e Santunan di e Deláster Dianan den nan edifisio di marmer i glas di 28 piso na Salt Lake City, ta hasi i deshasí. Por ehèmpel, Presidente di iglesia mormon no mester duna e iglesianan un relato finansiero, spesifikando pa ki propósito nan kontribushonnan tabata usá.

#### **E. Ofrendanan i Klériko**

Mormonnan ta pone hopi énfasis riba kontribushon di dies porshento di nan salario (e dèsimu) na e Iglesia di e Santunan di e Deláster Dianan. Nan ta orguyoso ku nan no ta hasi un distinshon entre laikonan i klero (esta un puesto pagá). Pues nan no tin un pastor pagá. Nan ta gusta tilda otro religion ku sí ta paga nan pastor, komo si fuera esei ta hasi mormonismo superior.

Ma Beibel mes ta mustra kla ku un iglesia mester sostené nan líder(nan) spiritual na un manera material (I Korintionan 9:1-14; II Korintionan 11:7-9; I Timoteo 5:17-18; èts.).

Ta notabel tambe, ku apesar di nan gabamentu, ta parse ku José Smith mes a risibí pago di iglesia mormon. Un revelashon den e *Buki di Mandamentunan*, ta bisa Emma, esposa di José Smith, "I bo no mester tene miedu, pasobra bo esposo lo sostené bo for di iglesia..."(26:8). Ora nan a kambia nòmber di e buki aki pa *Doktrina i Aliansanan*, nan a kambia e frase aki pa bisa: "I bo no tin mester tene miedu, pasobra bo esposo lo sostené bo *den* iglesia..."(25:9). Esaki ta un otro ehèmpel di kambionan di e "skrituranan inspirá" mormon pa nan kuadra ku e impreshon ku nan ke duna.

## F. Sena di Señor

Segun e *Buki di Mormon*, Kristo a aparesé na e nefitanan na e kontinentenan di e hemisferio oksidente despues di Su resurekshon, i a instituí e Sena di Señor pa nan tambe (III Nefi 18:1-9). *Buki di Mormon* (Moroni 4-5) i *Doktrina i Aliansanan* 20:75-79 ta duna instrukshon presis tokante e Sena

Ma maske e bukinan sagrado di e Santunan ta preskribí pan i biña pa e Sena kada siman, mormonnan ta insistí pa usa awa na lugá di biña. Dikon? Pasobra Hosé Smith a konta ku un biaha ora e tabata bai pa kumpra biña di un pèrsona ku no tabata mormon pa e Sena di Señor, un mensahero di shelu a bis'é "...no ta importá kiko boso ta kome òf kiko boso ta bebe ora boso tuma parti den e sakramento ...bo no mester kumpra biña òf bebida stèrki di boso enemigunan..." (*Doktrina i Aliansanan* 27:2-3).

Ma ta parse ku tin un otro motibu pa nan rechazo di e fruta di wendruif. Mormonismo tin un rabia riba e sánger di Kristo dramá riba krus di Kalvario. Niun kapèl òf tèmpel mormon ta dòrná ku un krus, ni paden, ni pafò—maske nan tin hopi otro símbolo masóniko si. Aparentemente nan no ke kòrda Hesus Su sánger dramá pa nos pikánan i p'esei nan ta nenga bebe biña òf djus di wendruif pa e Sena di Señor. Nan ta preferá awa, kisas reflehando nan preferensia pa salbashon dor di obra na lugá di Kristo Su obra kumplí. En kontraste, den Beibel, e krus di Kristo i Su sánger dramá ta un tema sentral. Pablo a deklará "mi a determiná di no sa nada meimei di boso, sino Hesukristo, i E krusifiká" (I Korintionan 2:2). "Ma oholá ku nunca lo mi gloriá sino den e krus di nos Señor Hesukristo..." (*Galationan* 6:14).

Mormonnan ta partisipá den e Sena di Señor komo un tèstimonio di nan fieldat pa warda Dios Su mandamentunan, no un medio pa haña salbashon. P'esei tur mormon batisá i digno, ku ocho aña bai ariba, ta tuma parti den e Sena kada siman.

## II. DOKTRINA DI TEMPEL

Iglesia di Hesukristo di e Santunan di e Deláster Dianan tin dos lugá unda nan por kumpli ku nan debènan spiritual: e iglesia mormon, na unda nan ta reuní tur siman, i e lugá mas importante, e tèmpel mormon. Kualke pèrsona por bishitá un sirbishi den un di e miles di iglesia mormon, pero ta solamente e fielnan di e sekta aki por bishitá un di nan tèmpelnan. E siguiente ta un lista di lokalidat di nan tèmpelnan i e aña ku nan a keda inougurá (1836 - 1986).

Sitio di Tèmpel	Fecha	Sitio di Tèmpel	Fecha
Kirtland, Ohio, Merka	1836	Riu Jordan	1981
Nauvoo, Illinois, Merka	1846	Atlanta, Georgia, Merka	1983
St. George, Utah, Merka	1877	Apia, Samoa	1983
Logan, Utah, Merka	1884	Nuku'alofa, Tonga	1983
Manti, Utah, Merka	1888	Santiago, Chile	1983
Salt Lake City, Utah, Merka	1893	Papeete, Tahiti	1983
Laie, Hawaii	1919	Mexico City, Mexico	1983
Cardston, Alberta, Canada	1923	Boise, Idaho, Merka	1984
Mesa, Arizona, Merka	1927	Sydney, Australia	1984
Idaho Falls, Idaho, Merka	1945	Manila, Filipiinas	1984
Berne, Suisa	1955	Dallas, Texas, Merka	1984
Los Angeles, California, Merka	1956	Taipei, Taiwan	1984
New Zealand	1958	Guatemala City, Guatemala	1984
London, Inglatera	1958	Freiberg, Alemanía	1985
Oakland, California, Merka	1964	Stockholm, Suesia	1985
Ogden, Utah, Merka	1972	Chicago, Illinois, Merka	1985

Provo, Utah, Merka	1972	Johannesburg, Sùit Afraka	1985
Washington D.C., Merka	1974	Seoul, Korea	1985
Sao Paulo, Brazil	1978	Lima, Peru	1986
Tokyo, Hapon	1980	Buenos Aires, Argentina	1986
Seattle, Washington, Merka	1980	Denver, Colorado, Merka	1986

No por balotá importansia di e tèmpel pa e Santunan di e Deláster Dianan. P'esei ta interesante pa nota ku esaki ta un di e hopi siñansanan mormon ku no ta basá riba Beibel. Sinembargu siguidónan di José Smith ta siñá ku e nefitanan a praktiká "kristianismo bèrdadero," esta mormonismo den tèmpelnan di e kontinentenan oksidente dos mil aña pasá.

Ritonan sekretu ta tuma lugá den e tèmpel ku ta di suma importansia pa mormonnan. Joseph Fielding Smith a revelá kon importante e seremonionan aki ta pa mormonnan: E "mandamentu mas grandi duná na nos, i obligatorio, ta e trabou den tèmpel pa nos mes i pa nos defuntunan."<sup>11</sup>

### A. Sekretunan Tokante e Ritonan den Tèmpel

Kada pèrsona ku ta tuma parti den un rito den tèmpel mester hura ku e lo no konta ningun hende kiko ta sosodé, ni su propio kasá. Dikon e ritonan aki ta tantu sekretu?

"E sekretu ekstremo aki ta nesesario pa motibu di e ritonan pagano ku ta sosodé den e tèmpelnan mormon. "E Rumannan" no ke laga hende ku no ta mormon sa pa nada, ni asta mormonnan ku no a kalifiká pa drenta den tèmpel. E nesidat pa esaki ta sali na kla dor di papia ku esnan ku a tuma parti den e inisiashonnan aki. Hopi di nan ta kompartí e shòk i disgustu ku nan a sinti ora nan a realisá loke ta sosodé den un tèmpel mormon. Si nan tabata sa adelantá, mayoria di nan nunca lo a drenta e tèmpel pa partisipá. Pero pasobra nan no a haña e informashon adelantá (ku lo a hasi'é pusibel pa nan usa nan propio boluntat pa skohe den e asunto aki) hopi mormon ta keda ku un resintimentu, i nunca mas ta bolbe na e tèmpel pa e motibu aki.

E sekretunan ku ta kurason di mormonismo ta prevení mishoneronan di papia e bèrdat ku hende nan buska pa konbertí. Nan ta supliká e pèrsona pa aseptá mormonismo komo "kristianismo bèrdadero restorá" sin ku e por haña sa e partinan mas sagrado (seketu) na kua e lo mester dediká su mes. Pues e presentashon di mormonismo dor di e mishoneronan ta sumamente desonesto."<sup>12</sup>

### B. Un Seremonio den Tèmpel

Pa un mormon yega na divinidat e mester tuma parti den e ritonan sekretu den un tèmpel mormon. Ma solamente 30% di mormonnan ta tuma e pasonan nesesario pa nan por ta digno pa tuma parti den e ritonan den tèmpel. I probablemente ta 10% so ku ta partisipá regularmente. Den otro palabra 90% di mormonnan no ta kalifiká mes pa alkansá divinidat. E echu ku solamente un for di kada dies mormon kisas tin chèns di haña salbashon finalmente riba su mes mester konsientisá hende di e frakaso enorme di mormonismo.

Pa un mormon por bira digno pa hasi su obra den tèmpel, e mester tuma 12 lès. E promé 11 lès ta enfatisá lealdat na José Smith i su iglesia i kon pa bira digno pa bira un "mormon di tèmpel." Solamente e di 12 lès ta trata ku e bishita na tèmpel. Pero ningun di e lèsnan ta revelá na e kandidato kiko ta bai sosodé durante su bishita na e tèmpel. Pues e kandidato ta prepará pa tuma parti den un rito di kua e no sa nèt nada. Ni lo e sa te ora ku e ta eksperensia e rito pa su

mes den e tèmpe. E ta haña sa solamente loke Brigham Young a bisa, ku den tèmpe e lo siña loke ta:

"...necesario pa bo, despues ku bo a bandoná e bida aki, i kapasidá bo pa kana bèk na presensia di e Tata, pasando angelnan ku ta pará manera sòldá, kapasidá pa duna nan e palabranan klave, e señalnan i símbulonan ku ta pertenesé na e sumo saserdosia, i alkansá bo eksaltashon etèrno apesar di tera i fièrnu."<sup>13</sup>

Awor e por saka afó ku si e apliká perfektamente e poder saserdotal misterioso ku e ta haña den e rito di tèmpe, lo e por yega te den presensia di e Tata, despues di pasa den hopi prueba den e mundu di spiritu. Tambe e por sa ku maske mormonnan ta papia di Hesus komo Salbador, finalmente ta e mes ta keda responsabel pa su propio salbashon, no Kristo.

Despues di kompletá e 12 lèsnan, e kandidato su obispo mester entrevist'é i aprobá p'é drenta tèmpe. Anto presidente di su distrito ta eksamin'é riba 17 diferente punto; entre otro, si e ta apstené di uso di kòfi, te, alkohòl, tabako, òf refresku ku ta kontené kafeina (Pepsi-Cola, Coca-Cola), si e ta apoyá su lídernan mormon, si e ta asistí fiel na tur sirbishi, si e ta duna e dèsimu di su salario na su iglesia, si e ta asosíá ku gruponan no-mormon, si e tin literatura anti-mormon den su kas, si e ta trata tur hende ku onestidát, si e ta moral. E mester afirmá tambe ku e ta obedesé tur e mandamentunan (loke di bèrdat ta ímpusibel pa hasi i pues kada pèrsona ku ta duna un kontesta positivo ta gaña). Esnan ku nan ta aprobá, ta haña e sertifikado "Rekomendashon pa e Tèmpe" indikando ku nan ta digno.

Awor e kandidato ta kla pa drenta tèmpe i partisipá den e rito di dos ora di kua e no sa nèt nada. El a dediká su mes siegamente na e lídernan mormon, José Smith i su iglesia.

Parehanan antisipando di seya nan matrimonio den tèmpe pa etèrnidat ta haña un shòk mes ora komo ku hende hòmer ta separá for di hende muhé. Kada un ta bai na un kamber, mester kita sunú, i ta haña un kapa tur habrí na banda pa bisti. Anto ta hiba e pèrsona na un otro kamber unda un ayudante di tèmpe ta laba diferente parti di e kurpa sunú ku awa i ungi ku zeta na un manera seremonial, ku un kantodi bendishon pa kada parti di kurpa labá i ungi. Despues e ayudante ta bisti'é e "pañá di saserdosia santu"<sup>14</sup> i ta bisa:

"...ku outoridat mi ta pone e bisti aki riba bo (pa i pa benefisio di \_\_\_\_\_ [nòmber di e pèrsona, e ayudante, tur dos ta menta nòmber di e defuntu], ku ta morto) ku bo mester bisti henter bo bida.

E ta representá e bisti duná na Adam ora el a hañ'é sunú den hòfi di Eden, i ta yamá e Bisti di Saserdosia Santu.

Si bo no sush'é, ma ta bèrdat i fiel na bo aliansanan, lo e ta un eskudo i un protekshon pa bo kontra e poder di e destruktork te ora bo a terminá bo trabou aki riba mundu.

Ku e bisti aki mi ta duná bo un nòmber nobo, ku bo mester kòrda sèmper, i ku bo mester ten'é komo sagrado, i nunca revelá (e nòmber) ku eksepshon di un sierto lugá ku lo wòrdu mustrá na bo despues. E nòmber ta

<sup>15</sup>

Anto e ta bolbe na e promé kamber i ta haña un bisti blanku. Den e seremonio e pèrsona lo mira Adam i Eva (dramatisá) forma un aliansa sekretu ku Elohim (DioTata mormon) promé ku nan ekspulshon for di e hòfi di Eden. E aliansa aki ta enserá un gesto sekretu (duna man un sierto manera), ku su nòmber, señal i kastigu.<sup>16</sup> Den e drama Elohim ta manda Pedro, Santiago, i Juan pa reskatá Adam i Eva. Nan ta identifiká nan mes na Adam i Eva ku símbulonan masóniko

sekretu di e saserdosia mormon. (E drama no ta splika kon ta pusibel ku Pedro, Santiago i Juan por a presentá na Adam i Eva komo ku nan a biba hopi aña despues di Adam i Eva.)

Adam i Eva ta kompañá e pèrsona na e sala di Reino Telestial i Mundu Terrestrial. Aki nan ta haña mas lei ku nan ta hura pa obedesé. Tambe nan ta siña e símbulonan, nòmbernan, señalnan, i kastigunan di nan saserdosia. Aki nan ta bisti e Kashaka di Saserdosia Santu, riba e bistí blanku.

E pèrsonanan ku ta tuma parti den e seremoniá awor ta haña un "tèst." Atrrobe e seksonan ta separá. E partisipante ta hibá dilanti di un kòrtina bunita fini ku tin diferente debuho masóniko (idéntiko ku esnan riba e paña djabou) i vários buraku. Patras di e kòrtina un ayudante den tèmpel ku ta representá "Señor" ta puntra e pèrsona pa duna e diferente señalnan i nòmbernan sekretu ku el a kaba di siña, pa e por pasa na otro banda di e kòrtina. E partisipante ta bisá ku despues di morto, e "Dios" mormon lo pon'é na prueba di e mésun manera, i si e no kòrda tur di nan lo e no por drenta den Su presensia, i lo e no por alkansá divinidat.

Anto e pèrsona i "Señor" tras di kòrtina ta hinka man dor di e kòrtina i ta para den e posishon masoniko di "sinku punto di komunión": bénesol di pia drechi pa bénesol di pia drechi, rudia pa rudia, pechu pa pechu, man pa lomba, i boka pa orea. Den e posishon "santu" aki e partisipante mester bisa e siguiente kanto masóniko perfektamente:

"Salú pa lombrishi, tuti pa wesunan, forsa den barika i spirnan, poder den e saserdosia sea riba mi i riba mi desendientenan dor di tur generashon di tempu te den etèrnidat."<sup>17</sup>

Awor ku nos a haña un bista chikiti di loke ta sosodé den tèmpel, nos ta pasa pa dos otro rito den tèmpel ku ta destaká.

### **C. Kasamentu Selestial**

Komo nos a splika kasamentu selestial kaba (kapítulo 9), nos lo no tuma mas espasio pa bolbe splika e rito aki.

### **D. Boutismo pa Defuntunan**

Gran mayoria (90%) di e ritonan ku ta tuma lugá den tèmpel ta hasí pa defuntunan. Ritonan pa defuntunan ta un siñansa importante pa mormonnan.

Boutismo pa defuntunan a originá ku dos supuesto revelashon ku José Smith a haña na Nauvoo, Illinois. Solamente *Doktrina i Aliansanan* 124 i 128 ta siña e doktrina aki i ta ta duna e contenido di e revelashonnan aki. Esun promé (19 di yanüari 1841) ta revelá ku boutismo pa defuntunan tabata ordená promé ku mundu a eksistí (124:33).

Poko tempu despues di haña e revelashon, José Smith i vários otro pèrsona a bai na riu Mississippi i kada un a batisá shen biaha, kada biaha pa un otro defuntu. Ma pasobra nan no a lista nòmber di e defuntunan, e boutismonan tabata inválido.

Mormonnan ta siña ku Hesus lo hiba e Evangelio na spiritunan di esnan ku no a haña oportunidat di tend'é tempu nan tabata na bida riba mundu, dunando nan e oportunidat pa arepintí i kere den djE. Ma esei no ta sigurá nan salbashon. Un pèrsona bibu mester batisá pa nan. Si esei no sosodé, nan no por ta salvá. Boutismo ta nesesario pa salbashon.

Komo mayoria hende ta muri sin sa di José Smith su iglesia restorá, p'esei mayoria hende ta bai pèrdí. Ma un hende bibu por batisá pa un defuntu. Pa e boutismo ta válido, e mester hasié den un tèmpel mormon i registrá nòmber di e defuntu. Esaki ta duna e "spiritunan den prison" chens pa bira mormon di tèmpel. Si spiritu di e defuntu ta aseptá e rito hasí p'é, lo e por bai na Paraíso unda tur defuntu mormon digno ta bai. Pues salbashon di e defuntu ta dependé di spiritu di e defuntu i di un pèrsona bibu. E pèrsona bibu mester batisá pa e defuntu i e defuntu mester aseptá e boutismo aki.



Esaki ta hopi importante pa mormonnan. José Smith a bisa, "E responsabilidat di mas grandi den e mundu aki ku Dios a duna nos ta pa sòru pa nos mortonan."<sup>18</sup> I segun presidente Joseph Fielding Smith, "...e mandamentu di mas grandi duná na nos, i ta obligatorio, ta e trabou di tèmpel pa nos mes i pa nos mortonan."<sup>19</sup> E di tres presidente mormon, John Taylor, a gaba, "...nos ta e úniko hende ku sa kon pa salba nos antepasadonan...di bèrdat nos ta e salbadornan di mundu, si nan lo ta salvá..."<sup>20</sup>

Segun Wilford Woodruff, di kuater presidente di e Iglesia di Hesukristo di e Santunan di e Deláster Dianan, e mortonan ta anhelá i ta buska pa mormonnan pa kumpli ku e ritonan pa nan:

"E mortonan lo ta bo tras, nan lo buskábo manera nan a buska nos den (tèmpel di) St. George. Nan a sklama pa nos, sabiendo ku nos tin e yabinan i poder pa redimí nan.

...dos siman promé ku mi a bai for di St. George, spiritunan di defuntunan a reuní rònt di mi, i nan tabata ke sa dikon nos no ta redimí nan"

Woodruff a sigui splika kiko el a hasi pa redimí spiritunan di defuntunan.

"...mes ora mi a bai den e lugá di batisá i a pidi ruman McCallister pa batisámi pa e firmadónan di e deklarashon di independensia (merikano), i 50 otro hòmbler prominente, yegando un total di shen, inkluyendo John Wesley, Kristobal Kolon i otronan...

Despues mi a batisá pa kada presidente di Estados Unidos, ku eksepsion di tres; i ora nan kousa ta hustu, un hende lo hasi e obra pa nan."<sup>21</sup>

Mormonnan ta gusta sita I Korintionan 15:29 na favor di nan siñansa di boutismo pa mortonan: "Sino, kiko esnan ku ta wòrdu batisá pa e mortonan lo hasi? Si di ningun manera e mortonan no ta wòrdu lantá, pakiko nan ta wòrdu batisá pa e mortonan anto?" Ta opvio ku e teksto aki di Beibel no ta referí na un rito ku kristiannan tabata praktiká. Den henter e buki Pablo a usa "ami," "nos," i "boso" pa skirbi di su mes òf e kistiannan di Korintio. Awor diripiente e ta usa e palabra "nan" pa un vèrsíkulo (15:29) anto regresá na e mèsun patronchi anterior. Ta parse ku Pablo ta referí na un grupo fuera di iglesia di Korintio ku tabata praktiká boutismo pa mortonan. Pablo no a enkurashá su lektornan pa sigui nan ehèmpel. E ta menshoná nan solamente komo un ilustrashon.

Pa ser onesto, e teksto aki ta kompliká. Tin hopi diferente punto di bista tokante nifikashon di e I Korintionan 15:29. Un regla di hermenéutika (métodonan di studia Beibel) ta pa nunca basa un doktrina riba un teksto ku interpretashon insièrto ku ningun otro teksto ta supstansiá. Esaki ta e úniko biaha den henter Beibel ku asta por haña e idea di boutismo pa mortonan. Algun mormon ta bisa ku e siñansa di boutismo pa defuntunan tabata den Beibel ora el a wòrdu skirbí originalmente, ma ku hende a sak'é for di e teksto original. Esei no ta e kaso. Ma asta si e krittika aki tabata bèrdat, tòg mormonnan tin un problema, pasobra nan buki ku supuestamente ta "e kumplimentu di e evangelio" (*Doktrina i Aliansanan* 42:12), esta e *Buki di Mormon*, ni sikiera un biaha ta menshoná e rito aki. Alkontrario, e ta deklará kla ku despues di morto no tin chèns pa salbashon (Alma 42:16).

Ta interesante ku e denominashon mormon, e Iglesia Reorganisá di Hesukristo di e Santunan di e Deláster Dianan, no ta praktiká boutismo pa defuntunan.

Pa mormonnan e ritonan den tèmpel ta e mandamentunan mas grandi. En kontraste, Beibel ta bisa ku e mandamentunan mas grandi ta pa stima Dios i stima bo próhimo (Marko 12:29-31).

### E. Geneologia

E Santunan di e Deláster Dianan tambe ta siña ku falta di batisá pa defuntunan lo afektá salbashon di un mormon bibu (*Doktrina i Aliansanan* 128:15). Segun José Smith, "E santunan ku ta neglish'é [boutismo pa mortonan] pa ku nan famianan morto, ta hasi esei ku peliger di nan mes salbashon."<sup>22</sup>

Pasobra salbashon di defuntunan i mormonnan bibu ta dependé di boutismo pa defuntunan, mormonnan ta buska ku masha kuidou pa haña sa nòmber di nan antepasadonan pa nan por batisá pa nan. E Iglesia di Hesukristo di e Santunan di e Delaster Dianan tin e sentro genealógiko (estudio di nòmbernan di generashonnan di pasado) di mas grandi na mundu. Algun año pasá e Sosiedat Genealógiko tabatin 575 empleado i iglesia mormon ta invertí por lo ménos \$4 mion kada año pa e sosiedat aki. E informashon aki ta wardá den profundidat den un seru di granít—unda e informashon ta protehá asta si un bom nuklear kai riba e seru. Tin tambe mas òf ménos 400 filial ku mas informashon tokante defuntunan, kooperando ku e mormonnan.

Na año 1966 ya kaba mormonnan a kompilá un lista di mas ku sinku bion nòmber.<sup>23</sup> Tin mormon ku ta buska pa añanan pa haña nòmber di un antepasado pa nan por batisá pa nan.

Ma Beibel ta reta siguidónan di Kristu pa nan ni "okupá nan ku fábula i ku kontamentu di generashon sin fin..." "Ma evitá kontroversianan bobu i genealogianan...pasobra nan ta sin probecho i no ta bal nada" (I Timoteo 1:4; Tito 3:9).



- 
- 1
  - 2
  - 3
  - 4
  - 5
  - 6
  - 7
  - 8
  - 9
  - 10
  - 11
  - 12
  - 13
  - 14
  - 15
  - 16
  - 17
  - 18
  - 19
  - 20
  - 21
  - 22
  - 23